



Inatsisartuni ilaasortat

Sivert K. Heilmann og Knud Kristiansen, Atassut

§ 37 malillugu apeqquteqaammut nr. 2011-62 akissut pillugu.

Asasakka Siverth K. Heilmann aamma Knud Kristiansen

Aluminiuliorfiliorniarneq pillugu suliniummut apeqqutisi martsip pingajuaneersut matumuuna akissavakka.

10. marts 2011
Sagsnr. 2011-046383

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: islin@nanoq.gl
www.nanoq.gl

Soorlu tusagassiutitigut tusarliunneqareersoq aamma uanga Naalakkersuisut sinnerlugit Inatsisartut Aluminiumik Suliniut pillugu Ataatsimiititaliaannut ilisimatitsissutigereeriga suliaq pingaaruteqartorujussuarmik maanna inissimavoq, politikkikkut aalajagikkavat suliap piviusunngortinniarnernat annertuumik sunniuteqassallutik.

Nalunaarusiat siusinnerusukkut suliarineqareersimasut takutippaat ajunngitsunik peqqutissarpassuaqartoq suliap piviusunngortinnissaanut. Nunanut allanut nioqquteqartarnerput annertuumik qaffakkiartussaaq siunissami kinguariinnut tulleriinnut atuuttussamik. Aalisarneq kisiat isertitsissutaasartutut Nunatta isumalluutigiunnaassavaa, suliffissuullu suliffissat pissanganartut ilinniartitaanikkullu periarfissat nutaat assigiinngitsut pilersissavai, immikkut ilinniagaqarsimangitsuniit ingeniørinut suliffigineqarsinnaasut.

Taamaattumik Naalakkersuisut qularnaarniarsarivaat aluminiuliorfimmik suliffissuassap siunissami annerpaamik iluanaaruteqarfiusarnissaa, taamatullu qularnaarniarlugu piffissami sivilunerpaami suliffissuup inuiaqatigiinnut iluaqutaanissaa.

Kiinamiut teknologiat atorlugu sanaartortoqarnissaq aamma kiniiserit sulisartut atorineqarnissaat Alcoap kissaatigaa sanaartornermi aningaasartuutissat apparsarniarlugit. Sanaartornissamat aningaasartuutissat qaffasissorujussuit maanna naatsorsuinerit ersersitaat peqqutigalugit Nunatsinni suliniut pilerinanngilaq nunani allani sananeqartussatut eqqarsaasersuutaasunut naleqqiullugu.

Suliat ineriartortinnissaanut ataatsimoorluta pilersaarutitsinni suli erseqqippoq sanaartorerup nalaanili sulisartut nunatsinneersut annertunerpaamik atorineqarnissaat. Taamaattumik nunatsinni suliffiit sulisartullu suliarisinnaasaasa naammassinnaasaasalu annertussusiat pisinnaasaallu Naalakkersuisut nalunaarsortinniarpaat, suliasat nunatsinni piumasaqaataasartunut naleqquttut nunatsinneersunut immikkoortillugit suliarinnittussarsiuunneqartarniassammata.

Nunami allamiut aamma nunatsinni suliffiutillit akornanni naapertuilluannngitsumik unammilleqatigiilernissaq pinngitsoortinniarnarlugu pisariaqarlunnarpoq erseqqissumik immikkoortissallugit suliasat suut nunani allamiut suliffiutaannut (assersuutigalugu kiniiserinut) suullu nunatsinni piumasaqaataasartut atorlugit suliarinnittussarsiuunneqartassanersut, taakku aamma nunatsinni sulisartunit suliarineqarsinnaasariaqarmata.

Isuqaatigiissutini kingullerni taaneqartuni ilanngunneqarsinnaassapput ilinniartut praktikkerfissaannik pilersitsinissat assigisaallu, tamatumuunakkutaaq qulakkeerniarlugu sanaartornerup aallartinneraniilli sulisussat suliassanut tulluuttunut ilinniartinneqartalernissaat.

Paasinarsissagaluarpas aluminiuliorfissamik suliniut piviusunngorsinnaanngitsoq immikut ittumik allamik 'pilersaarut b-mik' pilersaaruteqartoqanngilaq. Erngup nukingata iluaqutiginiarnissaanut periarfissaqartuarnissaa qularnanngilaq, taamatulli qularnanngitsigaaq aningaasarsiornerup immiut akilersinnaasumik iluaqutiginiarneqassappat inuusutissarsiuqatigalugu aningaasaliisartunik periarfissamik iluaquteqarusuttunik tunngaveqartariaqarnerput.

Inuusutissarsiuqatit nutaat ineriartortinnissaannut Naalakkersuisut siunertaannut aluminiuliorfiliorniarneq kisimi eqqarsaatigineqanngilaq, inuusutissarsiorfissalli allat, soorlu assersuutigalugit uuliasiorneq aamma aatsitassarsiornerit, takornariartitsineq aamma nerisassiornerup ineriartortinnissaat, ilaapput. Periarfissalli taakku piviusunngortinniarneri qularnartoqartiterput, taamaattumik aluminiuliorfiliorniarneq piviusunngussanngikkaluarpas Nunatsinnut, minnerunngitsumik Maniitsumut Qeqqatalu kommunianut, ajuusaarnartorujussuussaaq.

Naggasiullugu oqaatigissavara suliame soqutigisaqatigiinnut attuumassuteqartunut oqaloqateqartuarnissaa paasisutissiisarnerrullu pitsanngorsartuarnissaa Naalakkersuisunut pingaaruteqartuannartuummat. Tamanna aamma atuuppoq innuttaasut akornanni suliamek illersuullutik akerliullutillu peqatigiiffiulersimasunut, taakku namminneq oqaloqatigiinnissamik kissaateqarneri naapertorlugit. Tassunga aamma atatillugu immikkut taaneqassaaq innuttaasut arlaannaannulluunniit pituttorsimangitsut peqatigiiffiannik Maniitsumi pilersinneqarsimasumi oqaloqateqarneq. Peqatigiiffinni taakkunani inuit assigiinngitsunik isummersortut inissaqartinneqarput, piffissarlu ungasinnerusoq takorloorlugu illoqarfimmik pitsaasumik ineriartortinneqarnissaanik eqqarsaasorsortuupput. Qeqqata Kommuniamuleqatigalugu pilersaarutaavoq majimi Islandimut paasisarsiorneqassaaq soqutigisaqatigiinnit aamma taavani inuusutissarsiuqatigalugu ingerlatsisut sinniisaannik peqataaffigineqartussamik.

Inussiarnersumik inuulluaqqusilluta

Med venlig hilsen



Ove Karl Berthelsen